



3,000 tentera ambil bahagian Selamat berpisah untuk PM

KUALA LUMPUR, Jumaat — Lebih 3,000 anggota tentera dari tiga unit — Darat, Udara dan Laut mengucapkan selamat berpisah kepada Perdana Menteri Datuk Hussein Onn selaku Menteri Pertahanan dalam satu perbarisan perpisahan di Pangkalan Tentera Udara Diraja (TUDM) Sungai Besi di sini pagi tadi.

Ketibaan Datuk Hussein kira-kira jam 8.20 pagi disambut oleh Panglima Angkatan Tentera, Jeneral Tan Sri Datuk Mohd Ghazali Datuk Mohd Seth dan Panglima Tentera Darat, Jeneral Datuk Mohd Zain Hashim.

Kira-kira 578 anggota tentera berbaris dalam 'perbarisan satria' sepanjang satu di jalan yang dilalui oleh Datuk Hussein.

Turut menyambut beliau ialah Timbalan Menteri Pertahanan, Datuk Haji Abu Hassan Omar.

Datuk Hussein diberikan sambutan permadani merah berjalan turun ke pentas khas menerima 'hormat perdana' dari lebih 2,422 orang anggota tentera yang mewakili Tentera Darat, Laut dan Udara.

Bellau kemudian diiringi oleh Panglima Angkatan Tentera, Jeneral Tan Sri Datuk Mohd Ghazali menaiki kenderaan khas memeriksa perbarisan tersebut.

Datuk Hussein kemudian naik ke pentas khas untuk menerima cenderamata berupa pisau angkatan tentera dari Jeneral Tan Sri Datuk Mohd Ghazali.

Pisau tersebut ialah cenderamata yang biasanya diberikan kepada pegawai kanan jeneral berpangkat jeneral yang akan bersara dan penerima anugerah pingat 'Pahlawan Seri Perkasa' yang ketika ini dianugerahkan kepada

Jeneral Tan Sri Datuk Mohd Sani yang bersara dari Angkatan Tentera Malaysia tidak lama dulu.

Sebagai balasan, Datuk Hussein kemudian memberikan wang syiling 10 sen diambil dari sakunya (balasan adalah perlu diberikan, sama ada wang syiling atau seumpamanya oleh sesiapa yang menerima pisau tersebut).

Sejurus sebelum Datuk Hussein turun dari pentas khas, anggota tentera itu bersorak tiga kali dengan menyebut: 'Gempur Wira'.

Upacara ringkas berakhir 20 minit itu kemudian disusuli oleh penyampaian cenderamata di Bilik Orang Kenamaan.

Sembilan belas kontingen angkatan tentera menyertai perbarisan tersebut.

Bersorak

Upacara raksasa itu diiringi oleh pancaragam Angkatan Tentera terdiri dari gabungan pancaragam pusat Rejimen Askar Melayu Diraja, Pancaragam Kor Kavaleri Diraja, Pancaragam Tentera Laut Diraja dan Pancaragam Tentera Udara Diraja.

Upacara tersebut berakhir dengan doa selamat dan tabik hormat perdana.

Kemudian dalam satu upacara berasingan di Bilik Orang Kenamaan Ketua Setiausaha Kementerian Pertahanan, Tan Sri Mohamad Yusof Abdul Rahman menyampaikan penderamata berupa pinggan pewter berpahat gambar Kompleks Kementerian Pertahanan yang baru kepada Datuk Hussein.

Jeneral Tan Sri Datuk Mohd Ghazali pula menyampaikan 'plaque' besar dengan lambang semua unit Angkatan Tentera Malaysia dan pedang bagi pihak semua Jeneral.

Datuk Hussein kemudian bersalaman dengan pegawai kanan angkatan tentera sebelum menaiki kereta berlepas pulang melalui jalan yang dipagari oleh lebih 500 anggota tentera itu.

Cenderamata perpisahan

PERDANA Menteri Datuk Hussein Onn (kiri) selaku Menteri Pertahanan yang akan bersara 16 Julai ini menerima cenderamata berupa Pisau Angkatan Tentera yang disampaikan oleh Panglima Angkatan Tentera, Jeneral Tan Sri Datuk Mohd. Ghazali bin Datuk Mohd. Seth dalam perbarisan mengucap selamat berpisah di Pangkalan TUDM, Kuala Lumpur semalam.

Datuk Hussein kemudian membalas dengan memberikan wang syiling 10 sen kepada Jeneral Tan Sri Datuk Mohd. Ghazali.

Pisau tersebut biasanya ialah cenderamata khas yang dihadiahkan kepada pegawai tentera berpangkat Jeneral yang bersara.

Bahan asal dari Arkib
Negara Malaysia